

# **Bbaruha gya Paulo Gyakubanza hali Basosolanika Kwanjuura**

Bbaruha gigi gyakubanza hali Basosolonika gyahandiikiirwe Paulo, mukwenda wa Yesu Kurisito (1:1), mu bwire buyeicalirengimwo Kolinso. Yaagihandiikiiri harabiriho myaka 51 Yesu Kurisito amaari kubyalwa. Bbaruha gigi gikuteekwa kubba gyalingi gya kubanza mu bbaruha zaamwe zenseenya ziyaahandiikiiri. Paulo buyaalingi mu luyendu lwamwe lwakabiri lwa kutebya Makuru Garungi ga Kurisito, yaatandikisiiryeho kitebe kya beikiriza ba Yesu Kurisito mu ruhuga lwa Sosolonika (Bikorwa bya Bakwenda 17:1-10). Kiki kitebe kya beikiriza kyalingi na Bayudaaya banene na Bayonaani banene. Mu Sosolonika yaarugiriyo bwangu habwa Bayudaaya bamweji kumubyokeera (Bikorwa bya Bakwenda 17:5-10).

Paulo yaahandiikiiri Basosolonika kubatatiirya na kubeiramwo bihuulyo byabu, na maani maani ha nsonga gya kwira kwa Yesu Kurisito. Paulo yaananukisiirye Basosolonika nti babwo banyakukwa nibakwikiririza mu Kurisito, boodede Kurisito akwiza kubatwala; kandi de nti, boobo balibanza kwingira mu bwomi butamalikaho (4:16).

Kandi de yaabahandiikiiri kubatatiirya mu kwikiriza kwabu ha bintu bya musinge gwa

nzikiriza gya Kurisito. Bukwenda hwa bbaruha gigi hwicala hwa kuhuumuulya na kwiryamwo maani beikiriza ba Kurisito bali mu kurumbwa, aleke beege nti Ruhanga ali hamweji nabo; kandi de nti mu kumaliira bakwiza kusingura.

### **Bicweka Bihandu bya mu Bbaruha gigi nka Kubihondereeni**

- (i) Paulo naaramukya kandi naasiima Ruhanga habwa Basosolonika 1
- (ii) Paulo naabaza ha buheereza bwamwe hwa Sosolonika na ha makuru ga Timiteo gaayaamuleeteeri 2—3
- (iii) Paulo naalamba beikiriza ha mulingo gwa kwicaliramwo nibakulindiira kwira kwa Kurisito 4:1—5:15
- (iv) Kulamba kwa kumaliirira 5:16-28

#### *Biramukyo Kuruga hali Paulo*

<sup>1</sup> Gyagya Paulo, hamwenya na Silivaano, na Timiteo. Tubahandiikijiri bbaruha gigi, nywe kitebe kya beikiriza ba Yesu ba mu rubuga lwa Sosolonika, beikiriza mu Ruhanga, Bbaa weetu kandi, mu Mukama weetu Yesu Kurisito.

Ruhanga abahe mbabazi zaamwe, kandi, abahe kwicala kurungi na businge.

#### *Paulo Naasiima Kitebe kya Beikiriza ba mu Sosolonika*

<sup>2</sup> Biro byenseji butubba nitukusaba Ruhanga, tubasabira mbe, kandi nitutahoona na kumusijima habwenyu. <sup>3</sup> Kubba, twizuka mbe bikorwa bya kwikiriza kwenyu kumweikiririzemwo, hamweji na kutaho mutima kukora milimo mya Yesu Kurisito na

bihika, kandi, hamweji na kubba basigiku mu kunihira kumwicala nakwo mu Mukama weetu Yesu Kurisito.

<sup>4</sup> Beira bange, nywe ba Ruhanga bayendya, tukyegiri Ruhanga nka kuyaabatongoiri yaabafoora bantu baamwe. <sup>5</sup> Habwakubba, Makuru Garungi gakukwatagana na Yesu Kurisito gatwabatebeerye, gatakabbe ga bigambu kwankeenya; beitu, gaali gawa maani, maani ga Mwozo wa Ruhanga. Kandi, mwaweeni kwo biyo bigambu, nibili bya mananu. Kandi de, mukyegiri, nka kutwabakoleeri mu bigambu bitwabawereeri. <sup>6</sup> Kandi, mu biyo bigambu bitwabatebeerye, Mwozo wa Ruhanga yaabaheeri kusemererwa kunene, nabumwabba mwali nimukuwonawona. Mu ngeru gigyo yatyo, mwadoori kutuhondera na kuhondera ngesu za Mukama weetu Yesu Kurisito. <sup>7</sup> Kandi, mu ngeru gyogyo gimweji, mwafookiri kyakuwoneraho, hali beikiriza benseji ba Yesu ba mu bicweka bya Makedooni na by'Akaaya. <sup>8</sup> Kandi, mwasasanjiry henseji bigambu bya Ruhanga. Mutakabisasaanje mu Makedooni hasa, beitu na mu kicweka ky'Akaaya. Kwikiriza kwenyu mu Ruhanga kudoori ha kwegebwa hantu henseenya. Nahabwakikyo, tuweeni kitakwetaagisya, twe kubaza ha kwikiriza kwenyu kukwo. <sup>9</sup> Kandi de, bantu ba mu biyo bicweka byenseji baatuhanuliri mulingo gumwatutangiririmwo, na mulingo gumwalekiriho kuramya bisisani, mwatandika kuramya na kukoora Ruhanga, Ruhanga yogwo wa mananu, kandi mwomi.

<sup>10</sup> Kandi de, baatuweereeri nka kumukulindiira Mwana wa Ruhanga kuruga mwiguru, yogwo giyaahimboori kuruga mu bakuu. Yooyo Yesu alitujuna hali kiniga kya Ruhanga kikugyenda kwiza.

## 2

### *Paulo Naabaza ku Mulimo Gubaakoori mu Sosolonika*

<sup>1</sup> Beira beetu nka kumukyegiri, lubungo lwetu lutwababungiri, lutakabbe lwa busa. <sup>2</sup> Butwali tutakadoori kukwo Sosolonika hali nywe, bantu ba mu nsi gya Filipi, baatuwonawoneseerye, kandi de, baatujooga. Kyonkei, Ruhanga weetu mu mbabazi zaamwe, yaatuheeri maani twabatebeerya Makuru Gaamwe Garungi, nabuhabba haalingiho banyanzigwa beetu, banyakubba nibakwendya kutulemesya.

<sup>3</sup> Bigambu byensei bitwabatebeerye, byali kwahi bigambu bya hugobya, rundi biwa bigyendeerwa bya hwenzi, rundi bya kubadyaho bintu byenyu. <sup>4</sup> Beitu kandi, Ruhanga yooyo yankei, munyakutusijima, tutebye Makuru Garungi gakukwatagana na Yesu Kurisito. Yooyo yankei, munyakutwesiga yaatukwatya gugu mulimo. Nahawakikyoye, twe bigyendeerwa byetu, tibili bya kukora bintu bya bantu hibakwendya, beitu bintu bya Ruhanga byakwendya. Hawakubba Ruhanga yankei, yooyo awona mitima myetu.

<sup>5</sup> Kandi, tihalohoona kiro kyensei, nka kumwegiri, kitwabaweereerimwo bigambu bya kubakiina aleke mutwendye, kadi rundi bya

kwefoora-hwefoori beesigwa, mwa kwendya kubatoolahona bintu byenyu. Kubba Ruhanga yooyo, keiso weetu. <sup>6</sup> Kandi twe, tukutoolya kwahi bitiinisa kuruga mu bantu, kadi kibbe kuruga muli nywe nywankei, rundi mu bantu bandi. Kakibbe nti, nka bakwenda ba Kurisito, twali ba bugabe kubaweera mutufeeho, <sup>7</sup> twacwirimwo kubakwata mpula, nka mukali mbyeru kwafaaho baana baamwe. <sup>8</sup> Mukyege nti, twe twabendeerye hoj. Twabatebeerye Makuru Garungi ga Ruhanga, twataho na kuwona nti, tukoori kintu kyensej kikusoboka, twahayo na hwomi hwetu. Mal<sup>i</sup> kwo, mwali banywani beetu ba ku mutima.

<sup>9</sup> Beikiriza beira bange, mwizuke, nka kutwekambengi kukora na maani ijolo na mwinsi, tutakwendya kubafokera kizibu, kya nywe kutuha byetaagu byetu, butwali nitukubatebeerya Makuru Garungi ga Ruhanga. <sup>10</sup> Kale nu nywe, muli bakeiso beetu, na Ruhanga de niyeega, ba ngesu zeetu kubba nizili zirungi, bakora bintu birungi, kandi bataali na kakuu kensej, mu ngeru gitweicalirengemwo nanywe, nywe nka bantu bakwikiririza mu Yesu Kurisito. <sup>11</sup> Kindi, nka kumukwega mudulu mbyeru yensej, akwikiririza mu Ruhanga kwawoneera baana baamwe, natwe kwokwo tweicalengi na huli omwej, butwali nitucaali nanywe. Twabalambengi, nitubahuumuulya, kandi nitubekambisya, <sup>12</sup> mwicale nimuli bantu beesigwa hali Ruhanga. Kubba Ruhanga yogwo, yooyo yaabeetiri, yaabafoora bantu baamwe, aleke muwoneho ku kitiinisa kyamwe.

13 Kandi, t<sup>u</sup>s<sup>i</sup>j<sup>i</sup>ma Ruhanga h<sup>u</sup>li kiro, hab<sup>w</sup>akubba h<sup>u</sup>mwegwiri hutumwa h<sup>w</sup>amwe hutwabatebeerye, mwab<sup>w</sup>wikiriize nka hutumwa h<sup>w</sup>a mananu, hatali kukoba nti, byali bigambu byetu bya huntu huntu. Kandi, mwabi<sup>i</sup>ikiriize kwo, nka bigambu bya Ruhanga, hab<sup>w</sup>akubba na deeru lili, byobyo bili bigambu bikujuna h<sup>w</sup>womi h<sup>w</sup>enyu, nywe beikiririza mu Yesu Kurisito. 14 Mu ngesu zeenyu nywe beira beetu, mweiseeni nka kitebe kya beikiriza ba Yesu, Mutongoole wa Ruhanga, ba mu Buyudaaya. Kubba, nabodede nka kubawonaweeni mu Bayudaaya, nanywedede kwokwo banyansi beira beenyu babawonawoneseerye. 15 Kandi boobo, banyakwita Mukama weetu Yesu Kurisito na baraguri ba Ruhanga, baataho na kutubinga tubarugeho. Babwo bantu bajooga Ruhanga, kandi, beicala banyanzigwa ba bantu bensei. 16 Mu ngeru gigyoyoyi, bali mu kutugaana, tutatebeerya Banyamahanga bigambu bya Ruhanga, bikusobora kubaha kujunwa. Kwokwo yatyo, bali mu kweleetera musangu gundi ku gundi. Beitu hataati, Ruhanga mu kiniga kyamwe kinene, amaliriri kubafubira, hab<sup>w</sup>wa bibii byahu.

*Paulo Niyegomba Kugyenda hali Basosolonika*

17 Beira beetu, kakibbe nti, tumaari kasumi kadooli tutakuwonagana meiso na meiso, beitu kandi twe, mu biteekerezu byetu tubbanga hamwe nanywe. Kubba twe, mu mitima

myetu, tukwendeerya kimweji kwiza kubawonaho meiso na meiso, kandi tulwanisiirye de hoji, kwiza. <sup>18</sup> Kale nu twe, tukwegomba hoji kwiza hali nywe, na maani maani gya, Paulo. Ngereerye mirundi na mirundi kwiza, beitu Sitaani, munyanzigwa wa Ruhanga, yaatugeeni. <sup>19</sup> Beitu nabwo, nywenywe babwo, batunamwo kunihira, kandi, bakutuha kusemererwa. Nywenywe de, batukwiza kwesugusya nka kisenbu kya busingi, twenseji hutulyemeera hamweji mu meiso ga Mukama weetu Yesu Kurisito, ha kwiza kwamwe. <sup>20</sup> Mu mananu kwo, nywenywe de, mukutuha kitiinisa na kusemererwa.

### 3

#### *Paulo Naatuma Timiteo mu Sosolonika*

<sup>1</sup> Heinyuma gya kwicala tutakwegwa kintu kyenseji kikubafaaho, twe babiri twacwirimwo, twasigala mu rubuga lw'Ateeni. <sup>2</sup> Twabatumiiri Timiteo, mwira weetu kandi mukwenda wa Ruhanga mu kusaasaanja Makuru Garungi. Nsonga gitwamutumiri gyali nti, eize abatajiirye, kibahe kwemeera na maani mu kwikiririza mu Yesu Kurisito, <sup>3</sup> aleke kuwonawona kukugyenda kwiza mu meiso, kubaagye nimuli batatiro mitima. Habwakubba, hujune nka hujwo, hwohwo Ruhanga yaatutekaniriize twe, bantu beikiririza mu Yesu. <sup>4</sup> Kubba mu biro byeinyuma, twabaweereeri nka kutukwiza kuwonawona hoji. Kandi, kwokwo de, kibbeerji nka kumwegiri. <sup>5</sup> Nahabwakikyo, hunyaaweeni ntakusobora kwicala ntakwegwa bintu bikubafaaho, kwokwo

kubatumira *Timiteo*, eize yeetegereze nka kumwemereeri mu kwikiririza mu Mukama weetu, Yesu Kurisito. Habwakubba nyatiinengi Sitaani, munyanzigwa wa Ruhanga atabbanga abooheerye kusuula mananu ga bigambu bya Ruhanga na bintu byensej bitwabakoleeri, nibikamaliira bikwiri busa.

### *Timiteo Naaleeta Makuru Garungi Kuruga Sosolonika*

<sup>6</sup> Hatu nu, *Timiteo* nka kwamaari kuruga kukwo hali nywe, ejiriri na makuru garungi gakukoba nti, mucaali bantu batatiro mu kwikiririza mu Ruhanga kandi bakwendyagana nka beikiriza. Kindi +yaatuweereeri naakoba nti, bintu byensej bitwabakoleeri mucakabijizuka mbe. Kandi de +yaakobiri nti, mukwendeerya kimwej kwiza kutuwonahoona, nka twe kutubbanga nitwendeerya kimwej kwiza kubawonaho. <sup>7</sup> Nahabwakikyo, beira beetu nywe, kakibbe nti, tubbanga nituwonawona, kandi turumbijirwe banyanzigwa, twe tusemereerwe hoj kwegwa bintu bikubafaaho. Kituheeri kusemererwa, kyokyo kya kwegwa bigambu bya maani bikukwatagana na nzikiriza gyenyu mu Yesu Kurisito. <sup>8</sup> Habwakubba mukwetj kigambu kya Ruhanga na maani, natwe mitima myetu mihumuuri. <sup>9</sup> Kwegu nka kutuli na kusemererwa kunene habwenyu, mu meiso ga Ruhanga, tituli na mulingo, gutukusobora kumusijimirawona kikumala. <sup>10</sup> Nahabwakikyo, kyokyo tukwicalanga nitusaba Ruhanga, ijolo na mwinsi, tusobore kwiza kukwo



kubawonahoona na kubatatiirya mu bigambu byamwe, aleke mutabba na kikubaburwamwo.

<sup>11</sup> Nahabwakikyo, tukusaba Ruhanga Bbaa weetu, na Mukama weetu Yesu Kurisito, kutwebembera mu lulwo luyendu lwetu lwa kwiza kukwo hali nywe. <sup>12</sup> Kandi, tukusaba Mukama weetu Yesu Kurisito, abahe nywe bamwikirizamwo, kwendyagana hoj nka beikiriza mu Kurisito, na kwendya bantu bandi, nka twe kutubendya. <sup>13</sup> Mu ngeru gigyoyatyo, tukusaba Mukama weetu, abatatiiirye mitima, aleke Yesu Kurisito hwalijiza na bantu baamwe benseenya basyanu mitima, abaagye mutali na kakuu kenseenya mu meisoga Ruhanga kandi, nimukwomeera habwamwe yankei.

## 4

### *Beikiriza ba Yesu nka Kubakusemeera Kwicala*

<sup>1</sup> Kigambu kitukusembesyayo, beikiriza beira beetu, tukubapompogeerya nti, pe beiraba, mwehale kukora bikorwa bibiibi bya Ruhanga byatendya, nka kumubbanga nimukora. Kyonkei hataati, tukubasaba na maani gensej, mwibara lya Mukama weetu Yesu Kurisito, kukora na maani hoj na kukiraho. <sup>2</sup> Kubba, mwegiri biragirowe bitwabeegeseerye, mwibara lya Mukama weetu Yesu Kurisito. <sup>3</sup> Ruhanga akwendya mwomeere habwamwe yankei, makuru gaakyo nti, mwehale hwenzi, <sup>4</sup> kandi de nti, huli muntu yeege kufuga mubiri gwamwe, nikili nka kikorwa kya kitijinisa mu meisoga Ruhanga, na kwomeera habwamwe yankei.

<sup>5</sup> Timukusemeera kwicala nimwegombagomba, nka bantu bateikiririza mu Ruhanga, batamutamwo kitijinisa. <sup>6</sup> Kandi kwegomba kukwisana yatyo, otalikukora mwira waamu, rundi kugyendera mukali waamwe, habwakubba, Ruhanga alifubira bantu bensej, bakora bintu byensej bikwisisana yatyo, nka kutwabapompogeerye mu kubanza. <sup>7</sup> Kubba, Ruhanga atwetiri kwahi kwicala mu bibiibi, kyonkei akutweta tubbe bantu bakwomeera habwamwe yankei. <sup>8</sup> Nahabwakikyo, yogwo yensej akusuula kwege-sehwa, akubba ataswiri bigambu bya bantu, beitu akubba ajeemeeri Ruhanga yogwo, munyakutuha Mwozo Waamwe.

<sup>9</sup> Ha bintu bikukwatagana na kwendyangana nka beikiriza mu Kurisito, tikisemereeri muntu wondi yensej kubibahandiikira habwakubba, Ruhanga yooyo yankei yaabeegeseerye mulingo gumukusemeera kwendyangananga. <sup>10</sup> Kandi, kili kya mananu nti, beira beenyu beikiriza ba mwisaza lya Makedooni, mubbanga nimubendya kwo. Beitu beira bange, nkwendya kubasaba nti, mwendyengenenge na kukiraho nka kumubbanga nimukora. <sup>11</sup> Nka beikiriza ba Yesu kubakusemeera kubba, muli na kuwona nti, muteeriho mutima kwicala na businge na beira beenyu, muleke kwezingiirya mu bintu bitali byenyu, huli muntu yeege kukora milimo na ngalu zaamwe, nka kutwalingi tubawereeriho. <sup>12</sup> Mu kukora biyo bintu, mukwiza kutunga kitijinisa mu bantu bateikiririza mu Mukama weetu Yesu Kurisito, kandi kibahe kusobora kwezemeereeryaho nywankei,

mutakwesiga bintu bya bandi.

*Kwiza kwa Yesu kwa Kabiri*

<sup>13</sup> Beira bange, twe tukwendya kwahi mwicale nka bantu batali na kibegiri, ha bintu bikukwatagana na bahwo beikiriza ba Yesu beira beetu, banyakukwa. Tukwendya kwahi mubbe na nganye nka bantu bateikiririza mu Mukama weetu, bahwo batagira kunihira, mu bwomi bwa biro na biro. <sup>14</sup> Twe, beikiriza ba Yesu Kurisito, tukyegiri nti, Yesu baamwitiri, kandi yaahimbookiri kuruga mu bakuu. Nahabwakikyo tukyegeeri kimwei nti, Ruhanga akwiza kutwala Yesu, hamwenya na beikiriza baamwe banyakukwa, mwiguru. <sup>15</sup> Bigambu bitukubaweera hataati, bili bigambu bya Mukama weetu Yesu Kurisito biyaatwegeseerye. Twe bantu beikiririza mu Yesu Kurisito, bali boomi deeru lili, tukwiza kwahi kugyenda mwiguru, beikiriza beira beetu banyakukwera mu Yesu Kurisito, batakagyendiiri. <sup>16</sup> Mukama weetu yooyo yankei, alisirimuka kuruga mwiguru. Bwaliiza, bibi byobyoby bintu bilibbaho mwiguru: Ruhanga aliduumira neiraka lya hakyendi, lugwara lwa Ruhanga lulikuutwa, kandi, muhandu wa bamalayika ba Ruhanga, aliranga butumwa bwa Ruhanga. Heinyuma, bantu bensei banyakukwa nibakwikiririza mu Yesu Kurisito, boobo balibanza kuhimbooka. <sup>17</sup> Kasi mwomwo, twe bacaali boomi, kandi de, bakwiza kubba basigeeri inyuma mu nsi, balitusenga ha murundi gumwei, na bahwo beira beetu mu bikaka, nibatutwala

mu mwanya, kuromba Mukama weetu Yesu Kurisito. Heinyuma gya kututwala, tukwiza kugyenda kwicala nayo mwiguru, biro byensej. <sup>18</sup> Nahabwakikyo, na bibi bigambu byakwegesehwa, mutatijryengenenge mitima.

## 5

### *Mwetegekere Kwiza kwa Mukama Weetu*

<sup>1</sup> Beira bange, tihaloho kintu kyenseenya kimuteegiri, kinkusemeera kubamanyisa ha bintu bikukwatagana na busumi, rundi kiro, kya Mukama weetu alijiziramwo kuruga mwiguru. <sup>2</sup> Habwakubba mukyegiri nti, kikyo kiro kya Mukama weetu alijirimwo, aliiza bwangu nka mwibi kweiza ijolo, atabanziri kuruga. <sup>3</sup> Kubba hali bantu balibba nibakuteekereza nti, bali kurungi kandi bali na businge, hbwu hoho bintu bilihenekera bwangu, nka bisa bya mukali wa nda kubijiza bwangu ategiri. Kandi, tihaloho muntu yensej mu bawo bantu alikena kikyo kifubiro kya Ruhanga.

<sup>4</sup> Beitu kandi nywe, beira bange, muleke kwicala nka bawo bantu bali mu ntiti, bawo beicala mu bibibi na mu buteega. Nahabwakikyo, kiro kya kwiza kwa Mukama weetu kitalibaagya mutetekanize, nka mwibi hweiza ijolo. <sup>5</sup> Kubba, nywe nywenseenya, muli beikiriza ba Yesu, bawo banyakubyalwa kyererezi, mwabba baana bakora bintu hasyanu, mwinsi rubona. Beitu twe, twicala kwahi baana banyakubyalwa ntiti, bakora bintu ijolo, mu kyebisiire. <sup>6</sup> Nahabwakikyo,

tuleke kubba nka bantu bebbakiri, babwo badoma kandi batakwerinda, beitu kandi, tubbe bakengebu kandi bakwerinda. <sup>7</sup> Kubba, babwo bantu beebbaka, beebbaka ijolo; mu mulingo gwogwo gumweji, na babwo batamiira, batamiira ijolo. <sup>8</sup> Beitu twe nka kutuli baana ba kyererezi, bakora bintu hasyanu, twicala bantu bakwerinda. Nka musurukali yensei kwalwala ngabu musalaka aleke gimulinde, natwedede tukusemeera kulinda bwomi bwetu mu Kurisito, nitukwesiga Ruhanga, kandi nitumwendyanga. Kwokwo natwedede, tukusemeera kukwata na maani kunihira kwa kujunwa kwetu mu Kurisito, nka musurukali kwalwala kintu kya kumulinda mutwe. <sup>9</sup> Kubba Ruhanga, atakatukome kutufubira habwa kiniga kiyaalingi nakyo habwa bibiibi bya bantu; beitu kandi, yaatukomiri kutujuna, kuraba mu Mukama weetu Yesu Kurisito. <sup>10</sup> Yesu Kurisito yogwo, yaakwiri ha musalaba habwetu; aleke mu kukwa kwamwe, twe boomi, rundi bakuu, tusobore kwicala nayo mu bwomi bwa biro na biro. <sup>11</sup> Nahabwakikyo, mutatiryengene, kandi mwekambisyengene mu kwikiririza mu Yesu Kurisito, nka kumukukoranga.

*Kulamba kwa Paulo kwa Kumaliira*

<sup>12</sup> Hati nu beira bange, tukubasaba nti, mutengemwo kitinisa bahandu beenyu, babakoramwo mulimo gunyamaani, bali na busobozi hali nywe mu Mukama weetu Yesu Kurisito; kandi, babwo babeegesya kukora bintu birungi. <sup>13</sup> Mubatulenge kubba bantu ba bitinisa hoi, nimubendya. Habwakubba, bakora milimo

minyamaani mya kubawoneera. Mwicalenge kurungi na huli omweji, mu husinge.

<sup>14</sup> Beira bange, tukubasaba mupompogeerye bantu benseji bagarei, batunge milimo mya kukora. Babwo bali na butiini mu mitima myabu, mubatatiiyenge mu Mukama weetu Yesu Kurisito, na baceke mu milingo myenseji mubasagike. Kandi, bantu benseji, mubakwatenge mpula mpula na kugumisiriza.

<sup>15</sup> Muteikiriza muntu yenseji kuhoora nzigo. Beitu biro byenseji, huli muntu atengeho mutima, kukoora mwira waamwe mu Mukama weetu Yesu Kurisito kintu kirungi, na kukoora bantu bandi benseji.

<sup>16</sup> Mwicalenge musemereerwe mu mitima myenyu biro byenseji, <sup>17</sup> kandi, nimusabanga Ruhanga, mutakulekeera. <sup>18</sup> Mumusijimenge mu bintu byenseji, habwakubba kukwo kwokwo kwendya kwa Ruhanga hali nywe mu Yesu, Mutongoole wa Ruhanga.

<sup>19</sup> Beitu, mutalisuula kintu kyenseji kirugiri hali Mwozo wa Ruhanga, <sup>20</sup> kandi, mutaligayanga bigambu bya muraguri wa Ruhanga. <sup>21</sup> Bigambu byenseji bimwakeegwanga, mubanzenge nimubilinganja kurungi. Kikyo kyenseji kirungi, mukikwatenge, nimukita mu mitima myenyu.

<sup>22</sup> Kandi, mwehalenge bintu byenseji bibiibi.

### *Paulo Naaraga Beikiriza ba mu Sosolonika*

<sup>23</sup> Tukasaba Ruhanga, yogwo aleetaho husinge mu bantu, abahe mitima misyanu mu bintu byenseenya. Kandi de, tukumusaba, alinde myozo myenyu, na mibiri myenyu, aleke nywenseji

mwicale mbura kakuu kensej, ha kwiza kwa Mukama weetū Yesu Kurisito. <sup>24</sup> Ruhanga yogwo atweta naatufora bantu baamwe, eicala mwe-sigwa; nahaḥwakikyo, akwiza kudoosereerya biḥyo bintu byensej.

<sup>25</sup> Beikiriza beira beetū, natwe mutusabire hali Ruhanga.

<sup>26</sup> Beira beetū bensej beikiririza mu Yesu Kurisito, mubaturamukiirye na kusemererwa kunene hoj mu mitima myenyū.

<sup>27</sup> Nkubapompogeerya mu meiso ga Ruhanga, muwone nti, gigi bbaruha gisomeerwe hali bitebe bya beikiriza ba Yesu bensej ba mu Sosolonika.

<sup>28</sup> Katubasabire, Mukama weetū Yesu Kurisito abagiirenge mbabazi biro byensej bya ḥwomi ḥwenyū.

**Ndagaanu Gihyaka**  
**Gungu: Ndagaanu Gihyaka New Testament**

copyright © 2017 Wycliffe Bible Translators, Inc.

Language: Gungu

Contributor: Wycliffe Bible Translators, Inc.

All rights reserved.

2020-11-17

---

PDF generated using Haiola and XeLaTeX on 22 Feb 2024 from source  
files dated 29 Jan 2022

b2d1b010-ce36-53f8-94bb-ea31f34239cc